

ՍԱԼՂԱՆԻ ԵՐԳԵՐ

Նոր Նախիջևանի և նրա գյուղերի բնակիչներին շատերը զբաղվում էին ոչխարաբուծությամբ: Խաշնարածությունը շատ ընդունված էր նրանց պատմության դեռ Ղրիմի շրջանում: Գաղթելով Դոնի ափերը, նրանք Ղրիմից բերին մեծ քանակով դմակավոր սև ոչխարներ, որոնց սերունդը մինչև այժմ էլ կա:

Ոչխարաբուծների մի մասը կազմում էին «քեսեքչիները» կամ «օթառչիկները»: Սրանք զբաղված էին միմիայն ճարպի համար ոչխարներ գիրացնելու գործով: Նրանք իրենք ոչխարներ չէին աճեցնում, այլև ձմեռվա ընթացքում ոչխարաբուծներից գնում էին տարիքավոր ամուլ մնացած ոչխարներ, նրանցից կազմում «քեսեքներ», որոնց մեջ լինում էին շուրջ հազար գլուխ ոչխար: Այդ «քեսեքները» ամբողջ գարնանը, ամռանը և աշնանը արածեցնում էին ամենալավ արոտատեղերում, գիրացնում այնքան, որ աշնանը մինչև մի փութ ճարպ էին ստանում ամեն մի ոչխարից: Ոչխարները մորթում էին «սալղաններում», այսինքն՝ ճարպահալ գործարաններում: Ծարպը հալեցնում էին գործարանների հսկա կաթսաներում, լցնում տակաոնների մեջ և արտահանում Եվրոպա: Ոչխարների բուրդը և մորթիները գնում էին Եվրոպայի վաճառականները: Ծարպազուրկ միսը ծախում էին էժան գնով ժողովրդին, որ պատրաստում էին նրանցից ապուխտ, «էրեշ-կիկ», «բալիկ», լեզունները չորացնում և պահում «մառինատի» մեջ: Շատ օտարազգի վաճառականներ այդ ճարպազուրկ միսը աղում էին և մեծ քանակությամբ տանում Պոլիս և Եվրոպա:

Նախիջևանում եղել են շուրջ քսան «սալղաններ», որոնց վերջերս ռուսաց ազդեցության տակ անվանում էին «սալնիկներ»: Այդ «սալղաններում» ամեն տարի մորթում էին մի քանի հարյուր հազար ոչխար: «Սալղան-

ների» գործը քաղաքի և ամբողջ հարավային Ռուսաստանի տնտեսության մեջ բռնում էր մեծ տեղ: «Սալղաններ» ուրիշ քաղաքներում չկային, հայերը այդ զբաղմունքը բերել էին Ղրիմից: Ամբողջ Հյուսիսային Կովկասը և Հարավային Ռուսաստանը ճարպի համար գիրացրած իրենց ոչխարները քշում էին Նոր Նախիջևան և մորթում էին նրա «սալղաններում»: Այդ գործը հայ վաճառականները տարան և Ստավրոպոլ, Պյատիգորսկ և ոչխարներով հարուստ ուրիշ վայրեր:

«Սալղանները» բացվում էին և սկսում գործել հոկտեմբերի մեկից, նրանց բացումը կատարվում էր մեծ հանդեսով, ճաշկերույթով, քաղաքագլխի և այլ պաշտոնական անձանց մասնակցությամբ, «տառուլ-զուռնայի» քեֆով:

«Օթառչիկները» առհասարակ ունեոր մարդիկ էին, գործը շատ ձեռնտու էր, դրա համար էլ եթե մեկը լավ էր ապրում, ասում էին. «օթառչիկ է, օթառչիկի պես կապրի»:

Այս գործին նվիրված երգեր շատ և շատ են եղել, բայց այժմ գիտցողներ չկան: Մեղ հասել են հետևյալ հատվածները:

ՍԱԼՆԻԿԻ ԵՐԳ

Էզավ սալնիկ,
Եղ-միս իլինք.
Աբուխտ, էրեշկիկ,
Լեզու ու բալիկ,
Աղբարին օշթան,
Սուֆային քոշան,
Զուվան-չուվան,
Գախած գըշորնան,
Ցորեզը սուֆան,
Գիշերը թավան,
Բուլգեզ չաման,
Համան գըշորնան:

Բաշլայից սալդան.
Չամանով խըյման,
Հերիսան, դոլման,
Բումբար ու շըռդան,
Սամսա-խաթլաման.
Չըռըռ սամսան,
Փուռի թեւ սամսան,
Եղող շըռլաման,
Խորիզով գաթան

Շուր էլլան մեյդան:
Ամենը համան
Հարսնիքի գաթան,

Ուշգեզ կիզին
Գաբոնի-Միքայելին
Բեթեր կըբաթի
Միսով կուբաթի: